

e le Atua i tatou ina ia faia le mea sili tatou te mafaia, e filifili ai ae le o le tau faatonuina (tagai 2 Nifae 2:26), ma ia faalagolago atu ia te Ia. Atonu tatou te le vaai i ni agelu, faalogo i ni leo mai le lagi, pe mauaina foi ni uunaiga lofituina faaleagaga. Atonu tatou te fetuleni faalausosoo atu i luma ma le faamoemoe ma tatalo—ae e aunoa ma se mautinoa a'ia'i—o loo tatou faia e tusa ma le finagalo o le Atua. Ae a tatou faamamaluina a tatou feagaiga ma tausi i poloaiga, a o tatou taumafai atili e le aunoa e faia mea lelei ma atili ona lelei, e mafai ona tatou savavali ma le mautinoa o le a taialaina e le Atua a tatou la'a. E mafai foi ona tatou tautala ma le mautinoa o le a musuia e le Atua a tatou faamatalaga. O se vaega lea o le uiga o le mau lea o loo faapea mai: “Ona malosi lea o lou faatuatua fai ifo i luma o le Atua” (MFF 121:45).

A outou sailia i le tulaga talafeagai ma faalagolago atu i le agaga o faaaliga, ou te folafola atu o le a outou “savavali i le malamalama o le Alii” (Isaia 2:5; 2 Nifae 12:5). O nisi taimi o le a galue vave ai ma malosi le agaga o faaaliga, o isi taimi e faifai malie ma le le gaioia, ma e tele lava ona matua'i maaleale atonu o le a e le malamalama lelei i ai. Ae po o le a lava le mamamu e maua mai ai lenei faamanuiaga, o le malamalama na te aumaia o le a sulua ai ma faalauteleina ai lou agaga, ma faatupulaia lou malamalama (tagai Alema 5:7; 32:28), ma taitai ma puipua oe ma lou aiga.

Ou te tuuina atu la'u molimau faaposetolo o loo soifua le Tama ma Lona Alo. E moni le agaga o faaaliga—ma e mafai ma e galue i o tatou ola taitoatasi faapea foi i Le Ekalesia a Iesu Keriso o le Au Paia o Aso e Gata Ai. Ou te molimau atu i nei upumoni i le suafa paia o le Alii o Iesu Keriso, amene. ■



Saunia e Peresitene Thomas S. Monson

O Le Malumalu Paia—O Se Sulu Ta'iala i le Lalolagi

O faamanuiaga taua uma ma sili ona maua o le avea ai ma tagata o le Ekalesia, o faamanuiaga na tatou te maua i malumalu o le Atua.

Ou uso e ma tuafafine pele, e momoli atu o'u alofaaga ma faafeiloai atu ia te outou taitoatasi ma ou te tatalo ia taiala e le Tama Faalelagi o'u mafaufauga ma musuia a'u upu ou te tautala atu ai ia te outou i le aso.

Se'i ou amata atu i se faamatalaga se tasi pe lua e faatatau i savali matagofie sa tatou faalogoina i lenei taeao mai ia Sister Allred ma Epikopo Burton e uiga i le polokalama Uelefea a le Ekalesia. E pei ona ta'ua, o le tausaga nei e atoa i ai le 75 tausaga o lenei polokalama musuia lea ua faamanuiaina ai olaga o le toatele. O se faamanuiaga mo au lo'u iloina lelei o nisi o i latou sa uluai faatautaia lenei galuega tele—o ali o galuega alofa ma vaaiga mamao.

E pei ona ta'ua e Epikopo Burton ma Sister Allred, ua tuuina atu i le epikopo o le uarota le tiutetauave e tausai ai ma vaaia i latou o ē nonnofo i totonu o tuaoi o lana uarota. O se avanoa foi lena sa ou maua a'o ou

pulefaamalumalu o se epikopo talavou i le Aai o Sate Lekki, i se uarota e 1,800 ona tagata, e aofia ai fafine e 84 ua oti a latou tane. Sa toatele i latou na manaomia le fesoasoani. Sa toatele i latou na manaomia le fesoasoani. Sa maeu lo'u lotofaafetai mo le polokalama o le Uelefea a le Ekalesia, ma le fesoasoani a le Aualofa ma korama o le perisitua.

Ou te tautino atu o le polokalama Uelefea a Le Ekalesia a Iesu Keriso o le Au Paia o Aso e Gata Ai, e musuia e le Atua Silisiliese.

Ia o'u uso e ma tuafafine, o lenei konafesi ua atoa i ai le tolu tausaga talu ona lagolagoina au o le Peresitene o le Ekalesia. E sa'o lava o ni tausaga sa pisi tele, sa faatumulia i le tele o luitau ae sa i ai ma faamanuiaga e le mafaitaulia. O le avanoa sa ou maua e faapaiaina ai ma toe faapaiaina ia malumalu, o se tasi o faamanuiaga e aupito sili ona paia ma fiafia ai, ma e faatatau i le malumalu ou te fia talanoa atu ai i le aso.

I le konafesi aoao ia Oketopa i le 1902, sa faaalua ai e le Peresitene o le Ekalesia, o Iosefa F. Samita i lana saunoaga amata, le faamoemoe o le a i ai se aso e i ai ni o tatou “malumalu e fausia i vaega eseese o le [lalolagi] o loo manaomia ai mo le faafaigofieina i tagata.”¹

I le 150 tausaga muamua ina ua mavae le faatulagaga o le Ekalesia, mai le 1830 i le 1980, sa 21 ia malumalu na fausia, e aofia ai malumalu o Katelani, Ohio, ma Navu, Ilinoi. Pe a faatusatusa i le 30 tausaga talu mai le 1980, e 115 malumalu na fausia ai ma faapaiaina. O malumalu fou e 3 na fofogaina atu ananafi, e 26 malumalu ua faapoopo ua fausia nei po ua i ai i le uluai tulaga ua tapenapena ai mo le fausiaina. O le a faauuua pea ona faatupulaia nei fuainumera.

O le sini na faamoemoe i ai Peresitene Iosefa F. Samita mo le 1902, ua avea ma mea tonu. Matou te mananao ia matuai faigofie ona maua e tagata o le au paia le malumalu.

O se tasi o malumalu o loo fausia nei i Manaus, Pasila. I le tele o tausaga talu ai, sa ou faitau ai e uiga i se vaega e silia ma le toaselau tagata o le au paia na tuua Manaus, lea e i le totonugalemu o le vaomatua o Amasone, ae malaga atu i le malumalu e sili ona latalata ane, e tu i Sao Paulo, Pasila—e toetiiti 2,500 maila mai Manaus. Na malaga na Au Paia faatuatua i se vaa mo aso e fa i le Vaitafe o le Amasone ma ona magavai. Ina ua mae’a lenai malaga i le vai, sa faaee i pasi mo le isi tolu aso e malaga ai i auala gaoa, ma nai meaai laiti ma sa leai se mea e momoe lelei ai. Ina ua mavae aso e fitu ma po e fitu, sa latou taunuu i le malumalu i Sao Paulo, lea na faatino ai sauniga o le faavavau. O le mea moni, na tutusa lava le faigata o la latou malaga toe foi. Peitai, sa latou mauaina sauniga ma faamanuiaga o le malumalu, ma



e ui lava ina sa leai ni a latou tupe na totoe, ae sa faatumulia i latou lava i le agaga o le malumalu ma le lotofaafetai mo faamanuiaga sa latou mauaina.² O le taimi nei, ina mavae tausaga e tele mulimuli ane, ua olioli o tatou tagata i Manaus a o latou matamata atu i lo latou lava malumalu ua fausia i auvai o le Vaitafe o Rio Negro. E aumaia e malumalu le olioli i tagata faamaoni o le ekalesia i soo se mea e fausia ai.

O lipoti i osigataulaga na faia ina ia maua ai faamanuiaga e na o malumalu o le Atua e maua ai, e mautinoa lava e ootia ai lo’u loto ma aumaia ai ia te au se lagona faafouina o le agaga faafetai mo malumalu.

Sei ou faasoa atu ia te outou le tala ia Tihi ma Tararaina Mou Tham ma le la fanau e toa 10. Sa auai le aiga atoa i le Ekalesia, vagana ai le afafine e toatasi, i le amataga o le 1960 ina ua o atu faifeautalai i lo latou motu, pe tusa ma le 100 maila (160 km) i saute o Tahiti. E lei leva ae o latou mananao mo faamanuiaga o se aiga e faavavau ua faamauiina i le malumalu.

O le taimi lena, o le malumalu aupito latalata ane i le aiga o Mou Tham, o le Malumalu o Hamilton i Niu Sila, e silia ma le 2,500 maila i saute sisifo, ma e na o le malaga taugata i vaalele e mafai ona oo ai i ai. Sa leai se tupe a le aiga toatele o Mou Tham e pasese ai

i le vaalele, aua o lea sa ola taufaasoaso mai mea uma sa faigata ona latou maua mai se tamai faatoaga, ma sa leai foi se avanoa e faigaluega ai i lo latou motu i le Pasefika. O lea sa faia ai e uso Mou Tham ma lona atalii o Gerard se faaiuga faigata, e o e faigaluega i Niu Kaletonia, i le mea o loo faigaluega ai le isi atalii.

Sa faigaluega alii nei e toatolu o le au Mou Tham mo tausaga e fa. Sa na o Uso Mou Tham na faa-tasi ona foi i le aiga talu mai lena taimi mo le faaiipoipoga a sona afafine.

Ina ua mavae tausaga e fa, sa lava se tupe na teuina e Uso Mou Tham ma ona atalii e ave ai le aiga i le malumalu i Niu Sila. Sa o uma i latou, sei vagana ai le afafine e toatasi, sa maitaga. Sa faamauiina i latou mo le olaga nei ma le faavavau, o se aafiaga e le mafaamatalaina ma le fiafia.

Na toe talii sa'o mai lava Uso Mou Tham mai le malumalu i Niu Kaletonia, lea sa ia faigaluega ai mo le isi lua tausaga e totogi ai le pasese o le afafine e toatasi lea sa lei mafai ona latou o—o se afafine ua faaiipoipo ma lana tama ma lona toalua.

I tausaga mulimuli ane, na mana'ao ai Uso ma Tuafafine Mou Tham e faamisiona i le malumalu. E oo atu i le taimi lena, ua fausia ma faapaiaina le Malumalu o Papeete Tahiti, ma e fa misiona na la faia ai iina.³

Ou uso e ma tuafafine, o malumalu ua le na o ni ma'a ma sima. Ua faatumulia i le faatuatua ma anapogi. Ua fausia i tofotofoga ma molimau. Ua faapaiaina i osigataulaga ma auaunaga.

O le uluai malumalu lava na fausia i lenei tisipenisione o le malumalu lea o Katelani, Ohio. O le taimi lena sa matitiva le Au Paia, ae sa poloaiina lava e le Alii e tatau ona fausia se malumalu, ma o lea sa latou fauina ai.⁴ Sa mulimuli ane so latou malutaga—e

ui ina le umi se taimi—i auvai o le Vaitafe o le Misisipi i le setete o Ilinoi. Sa latou faaigoaina lena nofoaga o Navu, ma sa latou toe naunau foi e tuuina atu a latou mea uma, faatasi ai ma lo latou faatuatua maua'i, ma sa latou toe faatuina ai se isi malumalu i lo latou Atua. Sa matamataita sauaga, peitai, na toetoe ina a le uma le Malumalu i Navu, ae toe tutulieseina foi i latou mai o latou aiga, ma sa latou sailia ai se malutaga i se toafa.

Sa latou tauivi ma sa toe amatalia foi osigataulaga, a o latou galulue mo le 40 tausaga e faatu le Malumalu o Sate Leki lea o loo tu malualii nei i le poloka i le itu i saute o i tatou o loo i ai nei iinei i le aso i le Maota Autu mo Konafesi.

E maualuga lava osigataulaga e o faatasi ma le fausia o malumalu faapea foi le auai i le malumalu. E le mafaitaulia i latou sa galulue ma tauivi ina ia mafai ona mauaina mo i latou lava ma mo o latou aiga ia faamanuiaga o loo maua i malumalu o le Atua.

Aisea ua toatele naua ai ua naunau e tuuina atu le anoanoai o mea ina ia maua ai faamanuiaga o le malumalu? O i latou o ē malamalama i faamanuiaga e faavavau e maua mai i le malumalu, ua latou iloa e leai se taulaga e telē naua, leai se tau ua mamafa tele, leai se tauiviga ua faigata naua ia maua ai na faamanuiaga. E leai se mamao e le mafai ona laasia, leai ni mea faalavefau e le mafai ona foia, e leai foi ni faigata e le mafai ona onosaia. Latou te malamalama o sauniga faaola e maua i le malumalu e mafai ai i se aso ona tatou toe foi atu i lo tatou Tama Faalelagi i se mafutaga faaleaiga e faavavau, ma faaeeina ai i faamanuiaga ma le mana mai luga, e matuai aoga ai lava a tatou osigataulaga uma ma taumafaiga uma.

O le taimi nei, o le toatele lava o i tatou ua le mafatia i ni faigata ina ia

ō ai i le malumalu. E valusefulu lima pasene o tagata auai o le Ekalesia, ua nonofo nei i totonu o le 200 maila (320 km) mai se malumalu, ae o le toatele lava o i tatou ua matua vavalalata lava.

Afai ua outou ulu atu i le malumalu mo outou lava, ma afai foi tou te nonofo latalata atu i se malumalu, o lau osigataulaga o le faataatia ese lea o se taimi mai o outou olaga pisi, e asiasi soo ai i le malumalu. E anoanoai mea e tatau ona faia i o tatou malumalu mo i latou ua malilii. A o tatou faia galuega mo i latou, o le a tatou iloina ua tatou faataunuuina mea latou te le mafai ona faia mo i latou lava. Sa ta'ua e Peresitene Iosefa F. Samita i se tautinoga maoae: “O a tatou taumafaiga mo i latou [ua malilii], o le a toulu ese ai mai ia i latou o latou filifili o noataga, ma o le a aveesea ai le pogisa o loo siomia ai i latou, ina ia mafai ai ona susulu atu le malamalama ia i latou ma latou faalogo ai i le lalolagi o agaga i le galuega ua faia mo i latou, e a latou fanau iinei, ma o le a olioli ai faatasi ma outou i le faatinoga o nei tiute.”⁵



O’u uso e ma tuafafine, o la tatou galuega lea e fai.

I lo’u lava aiga, o nisi o o matou aafiaga aupito paia ma faapelepele na tutupu a o matou afaatasi ai i le malumalu e faatino ia sauniga faamau mo o matou augatama ua maliliu.

Afai e te lei alu i le malumalu, pe *ua* e alu foi ae o le taimi nei ua e le agavaa ai mo se pepa faataga, e leai se isi sini e sili atu ona taua mo oe e te galue agai i ai, nai lo le agavaa e alu i le malumalu. Atonu o lau osigataulaga o le faaogatusa o lou olaga ma le mea e manaomia ina ia maua ai se pepa faataga, atonu foi o le lafoa’ia o mausa ua leva ona e umia, ua e le agavaa ai. Atonu foi o le i ai o le faatuatua ma le amio pulea e tofogi ai lau sefuluai. Po o le a lava le mea, faagavaa oe e ulu atu i le malumalu o le Atua. Ia maua sau pepa faataga o le malumalu ma manatu i ai o se ‘oa taua, aua o se ‘oa taua lava.

A e le ulu atu i le Maota o le Alii ma maua faamanuiaga uma o loo faatalitali mai mo oe iina, e te lei mauaina mea uma o loo ofoina atu e le Ekalesia. O faamanuiaga taua uma ma sili ona maua o le avea ai ma tagata o le Ekalesia, o faamanuiaga na tatou te maua i malumalu o le Atua.

Ia, a’u uo talavou e, o ē o i ai i o outou tausaga o le talavou, ia i ai pea lava pea a outou vaaiga i le malumalu. Aua lava nei faia se mea o le a taofia ai oe mai le ulufale atu i ona faitotoa ma ‘ai ai i faamanuiaga paia ma le faavavau iina. Ou te faamalo atu ia te outou o ē o atu soo i le malumalu ma faia ai papatisoga mo e ua maliliu, i lo outou alapopo i taeo ina ia mafai ai ona outou auai i le faatinoga o na papatisoga a o lei amataina a’oga. Ou te le iloa po o le a se isi auala sili atu e amata ai se aso.

Ia te outou matua o fanau laiti, se’i ou faasoa atu se fautuaga atamai mai ia Peresitene Spencer W. Kimball. Fai mai a ia: “O se mea lelei tele pe afai . . . o le



a tuu e matua i potumoe uma i o latou fale se ata o le malumalu ina ia mafai ai e [a latou fanau], mai lea taimi i lea taimi [e] laiti ai, ona vaavaai atu i le ata i aso uma [seia oo lava] ina avea o se vaega o [latou] olaga. A [latou] aulia le tausaga [latou te] manaomia ai ona faia [le] faaiuga taua tele [e faatatau i le ulu atu i le malumalu] a o la ua uma ona fai.”⁶

E usuina e a tatou fanau i le Perameri:

*Ou te fia vaai i le malumalu,
Ou te ulu i ai i se aso.
E osifeagaiga [ma lo’u Tama];
O le a ou usita’i.*⁷

Ou te aioi atu ia te outou ia aoao a outou fanau i le taua o le malumalu.

E mafai ona avea le lalolagi ma nofoaga luitau ma faigata e ola ai. E tele taimi e siomia ai i tatou i mea e ono tosopalinaina i tatou i lalo. A tatou o i maota paia o le Atua, a tatou manatua feagaiga tatou te osia i totonu, o le a sili atu ona tatou mafaia ona onosaia tofotofoga uma ma faatoilaloina faaososoga taitasi. O totonu o lenei maota paia, o le a tatou maua ai le filemu; o le a faafouina ai ma faamalolosia i tatou.

Ia, o ‘u uso e ma tuafafine, toe tasi lava se malumalu ou te fia ta’ua a o le’i faaiuina. E le o toe mamao se taimi i le lumanai, a o fauina malumalu fou i le

salafa o le lalolagi, o le i ai se malumalu e fausia i se aai na tulai mai i le luaafe limaselau tausaga ua mavae. Ou te tautala atu e uiga i le malumalu ua fausia nei i Roma, Italia.

O malumalu uma o se maota o le Atua, e tutusa lava galuega e faia ai ma faamanuiaga ma sauniga. O le Malumalu o Roma, e tulaga ese lava, ma o loo fauina i se tasi o nofoaga e aupito logologoa i le lalolagi, o se aai na folafola atu ai e aposetolo anamua o Peteru ma Paulo le talalelei a Keriso, ma lea sa faamatuoina ai i la’ua.

O Oketopa talu ai, a o matou potopoto ai i se vaega i faoā aai matagofie i le itu i matu sasae o Roma, sa ou maua ai le avanoa e faia ai se tatalo o le faapaiaga a o matou sauniuni mo le suatiaina o le eleele. Sa uunaia a’u e valaaulia le Senate Italia o Lucio Malan ma le sui pulenuu o Roma o Giuseppe Ciardi ia i ai faatasi ma ē na tamua e suaina le eleele. O i la’ua o se vaega o le au faitonu na faatagaina ai i tatou e fausia se malumalu i lo latou aai.

Sa puaoa le aso ae sa mafanafana, ma e ui ina sa faamata’u mai le timu, ae sa na o se mataua se tasi pe lua foi na toulu. A o lagiina e le afaipese matagofie, i le gagana Italia le lagisolo malie o “Le Agaga Paia,” sa lagona e tagata uma e pei ua afaatasi le lagi ma le lalolagi i se viiga mamalu o

le faaneetaga ma le lotofaafetai i le Atua Silisiliese. Sa le mafai ona taofia loimata.

I se aso a sau, o le a maua ai e le au faatuatua i lenei Aai e Faavavau, ia sauniga o le faavavau i se Maota paia o le Atua.

E faailoa atu lo'u agaga faafetai e le muta i lo'u Tama Faalelagi mo le malumalu ua fausia nei i Roma, ma mo o tatou malumalu uma, po o fea lava o i ai. Ua avea malumalu taitasi o se sulu ta'iala i le lalolagi, o se faailoga o la tatou molimau o loo soifua lo tatou Tama Faavavau, e finagalo o Ia e faamanuiaina i tatou, ioe, ia faamanuiaina Ona atalii ma afafine ma tupulaga uma. O o tatou malumalu taitasi, o se faailoga o la tatou molimau e moni le ola i talaatu o le tuugamau, ma e maunitino lava e pei foi o lo tatou ola i lenei lalolagi. Ou te molimau atu ai.

O'u uso ma tuafafine pele, ia tatou faia soo se osigataulaga e tatau ai ina ia o ai i le malumalu ma ia maua ai le agaga o le malumalu i o tatou loto ma o tatou aiga. Ia tatou mulimuli i tulaga aao o lo tatou Alii ma le Faola, o Iesu Keriso, Lē na faia le taulaga silisili mo i tatou, ina ia mafai ai ona tatou maua le ola e faavavau ma le faaeaga i le malo o lo tatou Tama Faalelagi. O la'u tatalo lea ma lo'u loto atoa, ma ou te faia ai i le suafa o Iesu Keriso, amene. ■

FAAMATALAGA

1. Joseph F. Smith, in Conference Report, Oct. 1902, 3.
2. Tagai Wilson Felipe Santiago and Linda Ritchie Archibald, "From Amazon Basin to Temple," *Church News*, Mar. 13, 1993, 6.
3. Tagai C. Jay Larson, "Temple Moments: Impossible Desire," *Church News*, Mar. 16, 1996, 16.
4. Heber C. Kimball, in Orson F. Whitney, *Life of Heber C. Kimball* (1945), 67.
5. *Aoaoga a Peresitene o le Ekalesia: Iosefa F. Samita* (1998), 247.
6. *The Teachings of Spencer W. Kimball*, ed. Edward L. Kimball (1982), 301.
7. Janice Kapp Perry, "Ou Te Fia Vaai i le Malumalu," *Tusipese a Tamaiti*, 99.



Saunia e Elder Richard G. Scott

○ Le Korama a Aposetolo e Toasefululua

○ Faamanuiaga e Faavavau o le Faaipoipoga

E tele atu se faauigaga o le faamauga o le malumalu a o agaigai pea i luma le olaga. O le a fesoasoani ai ia te outou e mafuta vavalalata ma tele atu ai mea e ausia ma maua ai le olioli sili atu i le olaga nei.

○ lena savali matagofie na aumaia e lenei aufaipese ofoofogia ou te manatu, ua faamatala mai ai, le mamana o le olaga mo le toatele naua o i tatou: "taumafai ia faapei o Iesu."

I le aso 14 o Iulai, 1953 sa ma tootutuli ai ma la'u pele o Jeanene o se ulugalii talavou i le fatafaitaulaga o le Malumalu o Manti i Iuta. Sa faaoga ai e Peresitene Lewis R. Anderson le pule faamau ma ta'u ai i ma'ua o le tane ma le ava ua faaipoipoina mo le olaga nei ma le faavavau atoa. E leai so'u malosi e faamatala ai le filemu ma le toafimalie e maua mai i le maunitino, a tumau pea ona ou ola ia ou agavaa, o le a ma mafaia ma la'u Jeanene faapelepele ma a ma fanau ona faatasi e faavavau, ona o lena sauniga paia na faia i le pule tonu o le perisitua i se maota o le Alii.

Ua fusia le ma fanau e toafitu ia i ma'ua e na sauniga paia o le

malumalu. Ua maliliu si o'u toalua pele o Jeanene ma le toalua o le ma fanau. Ua latou tuuina mai se uunaiga mamana i tagata taitasi o totoe o lo matou aiga e ola ai, lea o le a maua ai e i matou uma faamanuiaga uma e faavavau na folafolaina mai i le malumalu.

O poutu taua lava e lua o loo lagolago ai le fuafuaga o le fiafia a le Tama i le Lagi, o le faaipoipoga ma le aiga. O le maualuga tele o lona taua, ua taulai atu ai taumafaiga faifai pea a Satani e faamalepe le aiga ma faavai-vaia ai le taua o sauniga o le malumalu, lea e fusia faatasi ai le aiga mo le faavavau. E tele atu se faauigaga o le faamauga o le malumalu a o agaigai pea i luma le olaga. O le a fesoasoani ai ia te outou e mafuta vavalalata ma tele atu ai mea e ausia ma maua ai le olioli sili atu i le olaga nei.

Sa i ai se taimi na ou aoaoina ai se